



ATASSUT

UPA 2016/46

Steen Lynge

04. 05. 2016

**Meeqqat atuarfianni atuartut akulliit ilinniarnissamut periarfissat assigiinngitsut qanoq atorneqarnissaannut atuartut ilisimasaasa annertusarnissaat siunertaralugu immikkut ittumik siunnersuinissat aallartinneqarnissaat aallartinniarlugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Suliniutissaq ukioq 2017-imi aallartinneqassaaq, paasisassarsiorlunilu angalanissanut, suliffeqarfinnut alakkarterinissanut suliffeqarfeqarfillu pillugu ilinniartitsinernut immikkut aaqqissukkanut aningaasanik kommuninit qinnuteqarfigineqarsinnaasunik pilersitsinissaq aaqqissorneqassalluni.**

(Inatsisartunut Ilaasortaq Naaja H. Nathanielsen, Attaviitsoq )

Atassut-mit siunnersuuteqartoq Naaja H. Nathanielsen, Attaviitsoq siunnersuutaanut qutsavigissavarput.

Nunatta ukiorpassuannortuni ilinniartitaaneq annertuumik suliniuteqarfigiuarsimavaa, meeqqat inuusuttullu meeqqat atuarfiini aammalu ilinniartitsinernut pitsaasunik periarfissaqartikkumallugit. Pingaarnersiuerni suliniut suli salliutinneqartoq.

Nunatta pissutissaqartumik tulluusimaarutigisinnaavaa, nunatsinni meeqqat atuarfiini atuarneq ilinniartitsinerni ilinniartitaaneq innuttaasunut akeqanngitsumik neqeroorutaammat. Nunatsinni meerartavut inuusuttortavullu soqutigisartik malillugu ilinniarnissartik sumut sammissanersoq namminneq aaliangersinnaavaat aammalu ilinniarnerninni aningaasarsiaqartutut taaneqarsinnaallutik.

Meeqqat nunani allani amerlasuuni meeqqat atuarfiini atuarnissaminnut periarfissaqanngillat, nunammi ilaat inuup ilinniarsinnaanissaminik pisinnaatitaaffiiniq ataqqinnigatik suliassaminik naammassinnissinnaanngimmata. Tamannalu tunngavigalugu tupinnanngitsumik meeqqat innuttaasullu nunani pineqartuni meeqqat atuarfiini atuarsinnaaneq aammalu ilinniagaqarsinnaaneq inuunerinnissamut periarfissatut pitsaalluinnartutut isigisarpat.

Ilinniartitaanerup inuunerinnissaamik tunngavissisarnera aamma nunatsinnut atuuppoq. Ilinniarsimassuseq inuunerinnissamut aammalu inuiaqatigiinnut peqataasinnaanermik pitsaasumik tunngaviliisarpoq.

Meeqqat atuarfiat taamatullu ilinniartitsinerni pitsaasumik tunngavissisappata, pisariaqarpoq meeqqat atuarfiata meeqqat pitsaasumik tunngavissinnissaat, tassalu atuartitsinerni pitsaassusaanik aammalu meeqqat ingerlariaqqilluarnissaannik siunnersuinerinik tunniussisinnaanissaq.

Ullumikkut meeqqat amerlavallaartut misigisarpaat, aatsaat meeqqat atuarfiat qimareerlugu paasisarmassuk qanoq sumullu ingerlaqqinniarlutik. Taamaasinikkut inuiaqatigiit meeqqat inuusuttullu ulluinnarni attaveqarfigineri annaasarpaat. Inuusuttummi suliffissaaleqisut akornannut piinnartarput– inuttut ingerlaqqissutissartik – ilinniarnissaagaluaq unitsiinnartarmassuk.

Siunnersuineq pitsaanerusup aammalu periarfissanik ilisimasaqarluarnerup meeraq pitsaasumik toqqaasinnaanissamik aallaavissaqarnissamik tunissavaa.

Atassut-mit tapersorsorparput siunnersuuteqartup meeqqat meeqqat atuarfiinik naammassinnginnerannik siunnersorneqarnissamik pitsaanerusumik tuninieqartarnissaannik anguniagaqarnera.

Naak Naalakkersuisut siunnersuut tunngaviatigut tapersorsoraluarlugu siunnersuutip allannguuteqarnissaa inassutigaat. Allannguuteqarnerup malitsigissavaa aningaasaliinermi siunnersuisarnerup assigiinngitsunik amerlanerusunillu suliniutinik periarfissaqarnissaq.

Atassut-mit Naalakkersuisut allannguutissatut siunnersuutaat ilalerparput, tassanimi periarfissat amerlanerusut pilersinneqassammata.